






Cim 5542


















CHRISTOPHORI VARSEVICII,  
C. C.

IN MORTEM  
PHILIPPI II. HI-  
SPANIARVM RE-  
GIS CATHOLICI,  
ORATIO.

Ecclesiast: cap: 30.

*Mortuus est pater eius, & quasi non est mortuus, similem enim reliquit sibi post se. In vita sua vidit, & letatus est in illo: in obitu suo non est contristatus, nec confusus est coram inimicis. Reliquit enim defensorem domus contra inimicos, & amicum reddentem gratiam.*



CRACOVIAE,  
Ex Officina Andreae Petricouij.  
Anno, 1598.



PHILIPPI II. HISPANIARVM REGIS CA-  
THOLICI &c. &c. EFFIGIES.



*Mundus Ade fuerat : poterat sed & esse Philippi,  
Hic annos centum si tetigisset homo,*



2  
ILLVSTRISSIMO  
PRINCIPI ET REVEREN-  
DISSIMO DOMINO D. GEORGIO  
CARDINALI RADIVILO NVNCVPATO,

Duci in Olica & Neswesz, perpetuo ad-  
ministratori Episcopatus Cracoui-  
enſ, &c. &c. Dño ſuo.

CHRIST: VARSEVICIVS, C. C. S.



*V*M in Regum Caesarumq, aliorum  
obitum, diuersis locis & temporibus su-  
nebres aliquando edidissē laudatio-  
nes, non potui non idem officii huic tan-  
to præstare Regi, regum et haud scio an  
hominum maximo omni ratione ac modo, siue imperi-  
um, siue magnitudinem spectes rerum domi forisq, ge-  
starum, siue vitæ ipsius exitum planè mirandum.  
Quod quantulumcunq, fuerit dedicare volui tibi, qui  
& de facie eum noueras, & magnum in aula eius hono-  
rem tibi delatum retuleras, cum pluribus ab hinc annis  
in Hispanias traiecisses. Habent habebuntq, semper, mo-  
res et ingenium, & finis ipse illius ut diximus vitæ, ad  
predicandum imitandumq, quàm plurima. Sed illud vel  
maximè vnum cōmendatione est dignissimum, quòd ta-  
lem tantaq, industria præditum, & piè diligenterq, e  
à se educatum reliquerit filium, non solum Imperii, ac




qualis & quanti? Verumetiam virtutis paterna successorum. Non peraque namque semper paternarum possessionum filij, sed imprimis regum rarissimi virtutum sunt coheredes. Hic vero ut iuuenis & potens fuerit, quorum alterum iudicium, alterum non patitur consilium, pij patris monita exemplumque secutus, mea ut fert opinio, ab omnibus diligere quam metui potius vult: & licet magna, diuinitus tamen credita uti, non abuti potestate, sicuti quidem videre ex ipsius est literis, quas ad Clementem viij. Pont: dedit Opt: Max: quarum adiunximus hic exemplum, lectu mea sententia non indignum. Etenim ab ungue quod aiunt leonem, & ab innata maturitate quadam ingenij, agnoueris regem etiam adolescentem. Cui fauendum profecto quam inuidendum potius est, tum quod tanquam alter quidam obex Turcicae potentiae fuerit, tum quod sua nemini nocuerit, tum quod & diuina lex inuicem ut nos diligamus docuerit, & denique quod moriendum postremo sit; cum & hunc ipsum potentissimum Regem omnium non modo potabile sed et portabile tam grande aurum, ab interitu non potuerit vendicasse. Ipse quidem vendicauit se, & si non ab hoc ab altero certe, quae viuendi & moriendi firmitas extitit illius singularis. Non potest namque male, qui bene vixerit, unquam extingui. Quod magis ad Dei Opt: Max: gloriam & multorum emendationem, hac quae tota sua duorum & septuaginta annorum vita aliquando gesserit, dixerit, perfecit, breuiter consignare  
literis



literis, visum est operæpretium, quanquam in memo-  
rabilibus eius multis, nos tantum attigimus aliqua, quæ  
vel nostris hominibus cognitu non ingrata fore spero,  
opto quidem certè, cum non tam ad nominis mei, cuius  
ego iacturam, modò Christo suus constiterit honos, faci-  
le patior, quàm ad gentis nationisq; meæ pertineat exi-  
stimationem, iis qui non solum sua, sed & externa no-  
runt literisq; produci non caruisse. Est enim industriæ ra-  
ritas ubiq; magna, sed in Aquilone maxima. Ego in-  
terim quantus quantus sum, qui scio quàm nullus sim,  
non aliud quàm Christi gloriam & utilitatem digni-  
tatemq; publicam, hoc laborioso genere vitæ habeo  
mihi propositam. Quod omnes bonos boni aequiq; con-  
sulturos omnino confido, & quod superest, Deum Opt:  
Max: precor, ut huius Regis similes multos maximèq;  
eius posteros Reipub. concedat, & ipsum quoque te  
florentem & diuturnum imprimis nobis præ-  
stet. Vale. Cracouia Kalendis De-  
cembris. Anno 1598.



EPISTOLA EX HISPANI-  
CO VERSA, PHILIPPI III. HISPANI-  
ARVM REGIS CATHOLICI, AD  
Clementem viij. Pont: Opt: Max.

 *Anctissime Pater. Placuit diuina  
bonitati, Regem & Dominum meum  
ex hac vita ad se euocasse. Magnam  
in Dei misericordia concipio spem,  
lucraturum eum plurimum, pro eo  
ac vixit, & diem suum tandem obiuit. Equidem  
qui talem tantumq; amiserim patrem, cum in eo  
quod mihi reliquerit non inueniam consolationem,  
ad Sanctitatem vestram recurro, ut me tanquam  
obedientem filium suum, suaq; sancta Sedis recipi-  
at, & simul atque is, qui officii gratia à me ad  
eam mittitur eo peruenerit, Deum Opt: Max:  
pro me oret, illuminare non grauetur me, ad zelo-  
sè tuendam religionem atque æquitatem. Id enim  
maximè expeto vnum patris mei hereditare. Cui  
idem ille Deus Opt: Max: beatitudinem largia-  
tur sempiternam, Sanctitatem verò vestram Ec-  
clesiæ suæ seruet diu incolumem. Hoc mihi vn-  
quam optatiùs fuerit nihil. Ex Monasterio  
S. Laurentij Idibus Septembris, Anno 98.*

# MAGNUM MAGNI PONTIFICIS CLEMEN: VIII. TESTI-

*monium Philippis Hispaniarum Regibus, patri & filio, huic viuo illi mortuo, publicè datum Anno, M. D. XC. VIII.*

**S**ANCTISSIMUS D. N. septimo Idus Octobris habuit, vt vocant, Consistorium, in quo cum iam accepisset certum de Regis Hispaniarum obitu nuncium, verbis valde bonis & prægñatibus affirmavit: Quod si aliquo aliquādo tempore sancta Sedes Apostolica iustam dolendi habuisset causam, in morte Hispaniarum Regis haberet iustissimam; qui nuper extinctus, magnam omnibus, sed suæ beatitudini maximam attulisset mœstitiā, quam instar obedientis filii perpetuò coluisset, & nihil eorum prætermisisset quæ ad sanctæ Sedis & suæ beatitudinis amplitudinem pertinerent. Atq; hæc quidem primùm cum dicta ab eo fuissent, & illud etiam addidit: Regem prudentiorem, iustio rem, æquitatis sine ullo delectu personarū tenaciore fuisse neminem, tolerantem deniq; magis, rerum omniū quæ incidissent humanarū. Quod ipsum in tot eius coniugum & liberū obitu fuit vidisse, & qui vicissim rebus ad nutum fluentibus vsus fuisset non minùs scienter quàm etiam moderatè. Quem deniq; amassent & suspexissent libentiùs subiecti, & timuissent hostes ac inimici, & qui rectè & cum quadam veluti æqualitate præmia & administrationes publicas partiri & conferre didicisset. Id testarentur maximè Episcopatus & sacerdotia ab eo distributa. Qua in re non aliud quàm Christi Opt: Max: gloriam semper respexit, & verè Catholici Regis nomini, factis & operibus respondit, cum nihil vehemētius curaret, quàm conseruationē Diuini ubiq; cultus & religionis. Neq; id solū in Hispaniis fecit, in quibus nullis parcendo laboribus & grauissimis quibusq; occupationibus, ad omnes difficultates se intulit medium, & delinquētes seuerissimè castigauit, quo etiā ipso ab omni hæresum lue cōseruata illa Regna fuerunt; verū etiam in aliis omnibus Regnis & Pro-  
uinciis



uinciis idem omnino obseruauit, in quibus nullo vnquam tē-  
pore libertatem conscientiarum concedere cuiquam voluit, &  
vt his malis remedia attulisset, atq; adeò vel aliorum Principū  
subiectos ad officium adduxisset, patrimonio suo regali nō pe-  
percit, & infinitos thesauros ex Indiis & Regnis Castellæ cor-  
rogatos profudit, aut potiùs in salute Reipub. collocauit, vt a-  
deò tota Regis Catholici vita non aliud quàm perpetua con-  
tra religionis hostes pugna fuisse videatur, vt non nisi ij qui tām  
beatitudine fruātur sempiterna, & cathalogo Sāctorum inserti  
sūt, huic tanto Regi comparare possint ac debeant. His ita di-  
ctis, duas aiebat esse res, quæ illū vicissim solarētur. Vna, cōfor-  
matio quædam ipsius cum Diuina voluntate, in qua diem clau-  
sisset extremum, quæ quòd in coelo esset, induceret eum ad  
credendum. Altera, quòd reliquisset filium & successorem sui  
per omnia similem. De quo pro se quisq; optimus conciperet  
spem, paternæ virtutis imitatore futurum, vt non tam suc-  
cessio quàm resurrectio potiùs appelletur. Pro quo etiam ipso  
affirmabat futurum preces se ad Deum Opt: Max: & alios ad  
idem faciendum toto animo exhortari, vt satis fiat vni pro eo  
quod præstitit, & alteri quod præstiturū se promittit. Nec mo-  
ra, afferri & literas Hispaniarum Regis quas superiùs posuimus  
& clara voce legi iussit. Quas cum omnes attentissimè au-  
dissent, diem exequiis demortuo dixit, & rursus ad  
ea quæ ad matrimonium Regis tractandum spe-  
ctant, Cardinales ex rituum congregatione  
tres, & duos nepotes suos ordinauit.



CHRISTOPHORI VARSEVICII,  
C. C.

In Mortem  
PHILIPPI II. HI-  
SPANIARVM RE-  
GIS CATHOLICI,  
Oratio.



VM aliis pluribus, ac in pri-  
mis quidem summis quibusq;  
Regibus, desideranda sit sa-  
lus: tum verò potissimùm iis,  
qui de Repub: præclarè me-  
riti semper sunt & fuêrunt.  
Quæ cum immortalis esse de-  
beat, & cum aliquando in vnius mortalis vita sa-  
lus dignitasq; eius versetur, optandum certè est, vt  
non modò florentes & diuturnos, sed si fieri adeò  
etiam posset, omnis interitus expertes Deus Opt:  
Max: patiat. Aut enim non nasci, aut nunquam  
debuissè mori, multos multi arbitrantur. Quod  
vel in hoc vno Philippo, huius nominis secundo  
Hispaniarum Catholico Rege regum, & haud  
B scio an

scio an ab orbe condito & hominum maximo  
perspici potuisse quis ignorat? Qui orientem vna,  
occidentem manu tenuit altera, & plurimorum  
regnorum prouinciarumque dominus, in summa  
potestate, summa moderatione animi, nec iam  
verbosa, sed rerum domina sapientia utebatur.  
Cuius adeò emortui virtus viuìt nihilominus re-  
gia, & sicuti egressum è tenebris lumen, sic cor-  
poris exutus exuuiis, in beatorum mentium sede  
magis elucet. Nos interim Christianos miseros,  
quorum quidam domino, quidam orbatì socio, in  
tanta barbarorum contra nos rabie, tantaque poten-  
tia, in alto ciuiliù bellorum seditionumque fluita-  
mus. Qui toto eo quo regnauit tempore, quod  
certè non modicum fuerat, quæ non dedit signa?  
quæ non reliquit exempla? quæ non expressit ve-  
stigia, virtutis, pietatis, prudentiæ, fortitudinis; &  
mansuetudinis suæ singularis? Ille, quod de Atlan-  
te fingunt Pòetæ, terrarum orbem humeris suis  
Christianum sustinuit; ille paternum imperium, at  
quale & quantum, auxit; ille Christianorum regna  
& prouincias contra Turcas defendit; ille in ori-  
entis & obeuntis solis vltimis religionem Catho-  
licam mirificè propagauit. Cedant huic omnes  
omnium nominum Principes, soli gubernandi ar-  
tium omnium artem & intelligentiam concedant.  
Non Græcorum Agesilaus, non Romanorum aut  
potius Hispanorum Traianus, vt in multis paucos  
numerem,



numerem, æqualem gloriæ & æquitatis partem  
cum hoc vno petant: melius is vixit, quàm qui re-  
gulas vitæ, olim ille scripsit. Melius in tam alta  
specula tantisq; procellis tot populos rexit, quàm  
humirepens aliquis ipsum se in pacato textit. Sa-  
pientius in utroq; orbe ius reddidit, quàm legis-  
lator iura suis dedit. Plura & difficiliora bella in  
penicioribus Pallatij sui confecit, quàm in acie  
non nemo bellatorum gefsit. Pacis inter arma  
dominus; domi hostibus terribilior fuit, quàm  
qui foris longè atque latè vexilla sua circumtulit.  
In omnibus deniq; temporibus atq; locis talem se  
præstitit, qualis vix optari nedum sperari alter po-  
terit; non magis ad imitationis exemplum, quàm  
ad ipsam veritatem historiæ literis monumentisq;  
publicis posteritati commendandus. Quò magis  
cùm sicuti quidem viuo nullus non habitus ho-  
nos: sic nunc demum mortuo nulla non debeatur  
laudatio. Cuperem profectò huius tanti Prin-  
cipis, non iam exornandis, sed enarrandis lau-  
dibus, vel aliqua ex parte voluntati parem affer-  
re posse me copiam & facultatem dicendi. Satis  
enim sit alicui velle, cunctis quidem pulcherri-  
mum fuerit scire, summorum virtuti Principum  
funebri oratione respondisse. Sed quod in exacti-  
oribus quibusq; artificiis vsu venit, ut quò in ali-  
qua re plus diligentia & operæ aliquis posuerit,  
eo minus id quod sequitur assequatur: hoc & ego

de tanto & tam admirabili dicturus Rege, ne mihi eueniat metuo, & non modò animo, sed corpore toto hanc prouinciam perhorresco. Maius enim quàm infantis, vituperium est præuaricatoris. Quis enim obsecro reperiatur, cuius Philippi secundi Hispaniarum Regis Catholici, virtuti & amplitudini & terra mariq; rebus maximis gestis, par fuerit oratio? Magnos ille, atque haud scio si post hominum memoriam non omnium maximos, habuit maiores sex aut septem Romanos Imperatores; qui, ne vetustiora repetam, à Rudolpho primo Romanorum Cæsare origine tracta, nomen familiamq; suam, longa annorum continuataq; imperandi serie, & incredibili rerum gestarum magnitudine, perpetuò illustrârunt. Ac de Patre quidem ipsius Carolo v. Cæsare, æterna recordatione dignissimo, tot ac tanta occurrunt memoranda, vt percensere oratione quæ gesserit cuncta, factu penè sit incredibile; nefas verò cùm incoeperis vel aliqua præterire. Qui cùm duobus minus quàm centum abhinc annis foelici nomine & omine Gandauī natus esset & vigesimum ætatis suæ annum tum temporis vix excessisset, concordibus Electorum Imperii suffragiis, absens licèt, Romanorum Imperator Francforti est declaratus. Nec ita multis post elapsis annis, fortissimo genio ingenioq; ipsius ad maiora, si maiora dici poterant, perpetuò aspirante; orto inter Hispanias Galliasq;



Galliasq; atrocissimo bello, earum Regem Franciscum, ad Ticinum prælio victum, captivum fecit, & in Hispanias sibi mitti vel quàmprimum imperavit. Grata enim præda pro se semper quibusq; visa est militibus, sed multò etiam grata fuerit magis, Regalis personæ ipsismet Principibus. Hoc igitur, post longas & varias deliberationes, liberè tandem Madrìdo ire iussu, Carolus Cæsar Hispalim, vrbium Hispaniæ celeberrimam ditissimamq; Indica maximè nauigatione effectam, profectus est, & demum nuptias cum Isabella Regis Emmanuelis Lusitaniæ filia, admirabili pompa & magnificentia celebravit; ex qua vertente anno à Christo nato, supra mille quingentos septimo & vigesimo, Mense Maio, hunc suscepit filium, quem patris sui Philippi nomen, & rursus Philippi Iacobiq; Apostolorum circa quod natus proximè fuerat festum respiciens, Philippum appellavit. Est enim Philippi & Iacobi Apostolorum ipso anni tempore celebritas festi vbiq; læta, sed in Hispaniis ob tot tantasq; victorias Diuino primùm propitio numine, postea etiam tutelari Iacobi Compostellani Apostoli nomine inclamato, partas, lætissima; tum & ipsa Indicæ nauigationis sub Philippo primo adinuentæ recordatione, qua in terrarum orbem tantæ effusæ sunt opes, periucunda. Quò etiam vidisses faciliùs, quantum vtriusq; aui & patris merita struxerint huic Philippo gradum

ad patritum & auitum Hispaniarum regnum, summo cum populi applausu consequendum. Bonum enim amplum, sed multò est meliùs beneuolentia ciuium firmum relinquere filio principatum. Vix igitur pubescere hic Philippus noster coeperat, cum nauigaturo extra Hispanias patre, illa regna gubernanda ab eo obtinuit, & demum cum Maria Lusitaniæ regis filia, in vrbe Salamantina nuptias celebrauit. Quæ Carolum, ipsa in puerperio mortua, enixa est ei filium, principio quidem magnæ secus ad extremum expectationis. Regum enim nati (vt plerunq; fit) in cunis parentibus voluptati, progressu ætatis plusquàm credibile fuerit, ad omnem licentiam sunt inclinati. Nec mora Smalcadico seu Saxonico bello à Carolo v. Cæsare in Germania sopito, idem ille Philippus ab eo euocatus, & Andrea Auria duce, classe ex Hispaniis vectus, in Italiam primùm demum & in Germaniam superuenit. In quo ipso itinere, qui & quantus vbique habitus fuerit ei honos, longum esset per censere; summus quidem certè, siue Principum Italiæ occursum, siue splendorem, qui obuiam ei ibant, equitum atq; peditum, siue apparatus & magnificentiam, qua eum excipiebant, urbium intrueri voluisses. Primùm enim alios, demum etiam ipsos se auent mortales cum inceperint superare. Iam verò cum à longè prospiceret Cæsar, Hispanias vix ab aliquo alio, quàm à sui generis seminisq; re-



nisq; rege posse aliquando gubernari, non incom-  
modè in Philippi locum filii, in eadem classe nauig-  
gare in eas voluit Archiducem Austriæ Maximili-  
anum Regem Bohemiæ designatum, quem quòd  
vnicè diligeret, Mariam suam filiam in matrimo-  
nium ei promiserat collocare. Philippo interim  
filio, qui iam fortè ad eum aduentabat, Arscota-  
num obuiam misit Ducem, cum non contemnen-  
do equitum & peditum numero, vt non secus ac  
Lucius olim Æmilius Paulum ipsemet triumphat-  
or deduxisset. Iucundum quippe est parentibus,  
habere filios gloriæ suæ spectatores. Omitto igitur  
qui primùm in Italia Ianuæ, qui Mediolani,  
qui Mantuæ, qui in Venetorum principatu, qui  
alibi in aduentu Philippi, festi habiti & celebrati  
fuêrunt dies. In Comitatum Tyrolen vt venit, in  
arcu triumphali Roueræ scriptũ illud spectabatur:

*Felix Austria domus, felicius Romanorum imperium.  
Felicissimam Christianorum Rempub. trium diuorum  
Cæsarum,*

*Friderici clementia, Maximiliani prouidentia,  
Ac potentissimi Caroli iustitia; diuorumque Regum  
Philippi*

*Et Ferdinandi Christianissimorum virtutum & ar-  
morum gloria.*

Inde longiùs proficiscens, multis & magnis via-  
rum difficultatibus per hyberna superatis, Calen-  
dis Aprilis Bruxellanam urbem inter Cardinalem

Tridenti-

Tridentinum & Philibertum Sabaudia Ducem  
medius ingressus, à duabus verò amitis, vna Leo-  
nora Francia, Maria Hungaria regina altera, in  
penitiora Palatii deductus, Carolum suum patrem  
demissè admodum & reuerenter salutauit. Nullam  
tum maiorem quàm aduentu Philippi vidisses læ-  
titiā, in qua regali pompa & magnificentia, vnus  
cum altero, tam principum quàm vrbium inter se  
decertasset. Cæsar etiam ipse, inter tot spectaculo-  
rum & congratulationum certamina, de concili-  
andis filio principum populorumq; animis maxi-  
mè laborauit, & tandem Augustam Vindelicorum  
venire ipsum voluit; vbi comitiis Imperii omni-  
um frequentissimis habitis, de successore Imperii  
eligendo, licet Ferdinandus frater Romanorum  
Rex superstes fuerat, occultò cum quibusdam  
egit, & interea temporis Archidux Maximilianus,  
multis nec opinantibus, eò etiam ex Hispaniis for-  
tè aduenit. Vehemens hæc & inuidia contentio-  
nisq; plena fuerat disceptatio, & cuius initium  
quàm exitum facilius inueniri dixisses potuisse.  
Nam in Maximilianum Archiducem Austriae pluriū  
studiis propendētib; quorum tum dux & auctor  
Mauricius elector Saxonie fuerat nouus & in Cæsa-  
rem parū gratus, nō modò infectis rebus, sed quasi  
etiam exulceratis inter Cæsare & Ferdinandū Ro-  
manorū Regem animis, est discessum; adeò infidū &  
timoris ac suspicionis imperiū est plenum, vt nec in-  
ter fra-



ter fratres quidem omnium coniunctissimum animum fecerit perpetuò æquabilem & nullis offensionibus variatum. Non longo igitur interiecto tempore, eadem illa qua venerat via, Philippus Rex in Hispanias iuit, & gubernacula quæ fratri patrueli & sororis suæ marito commiserat, rursus assumpsit. Connubiis namq; inter se Regum non tam disrupta quàm dissuta amicitia firmatur, sed ius & possessio nihil minus quàm alteri cuiquam conceditur dominandi. Mortuus paulò post Edwardus Rex Anglorum fuerat, & eius soror Maria gubernaculis Regni potita, vltra opes & diuitias, summa prudentia & æquitatis laude passim & vbiq; celeberrima habebatur. Cui cùm multi & varii thori proponerentur socii, illa quidem ad nullum vnquam alium, quàm ad Philippum Caroli v. Cæsaris filium, interponente pro eodem illo se & Regnum Neapolitanum ei propterea concedente, animum maximè inclinavit, & certis initis pactis, matrimonio ipsi se coniunxit. Appulit in Angliam ille patris sollicitatus literis, ingenti classe ex Hispaniis vectus, Mense Iulio, anno à Christo nato, supra mille quingentos quarto & quingentesimo, & regni hæredem Mariam, Henrici viij. Regis Angliæ filiam, quæ tota patri dissimilis facta, religionem Catholicam, Cardinale Polo auctore, reducere rursus voluerat, magno virorum nobilium & militum stipatus numero, quorum ta-

men vt promiserat quatuor millia in Belgiū miserat, Vintomium venit, & die D. Iacobo Hispaniarum patrono sacrato, nuptias cum ea celebrauit. Quo profectò tempore euidenter vidisses, quantum in hæretico regno, re & nomine Catholici regis valuerit auctoritas, cum vix non eodem illo (vt ita dicam) quasi momento, orbis terrarum omnium omni ratione insulā maximam, sub nouo Rege ad religionem Catholicam, quasi postliminio redeuntem conspexisses. quippe multæ multis rebus Insulæ, Anglia illa vna, amplitudine, opibus & populorum frequentia cunctis aliis antecellit. Accidit verò eodem illo tempore, vt Isabella Mariæ reginæ soror, quam illa hærescos suspectam volebat esse extinctam, eius Philippi regis interuentu seruaretur. Quantumuis licet nec Regi ea misericordia satis postea à suis laudata, neq; Anglis dominatio extitit diuturna: Iam enim eodem illo anno, Mense Augusto, ad patrem profectus, regnorum & prouinciarum eius omnium, ab ipso sibi renunciata suscepit gubernacula, & Regina Maria eius coniuge mortua, Isabella Boleniæ filia, Anglia est potita. Agebat Carolus Cæsar annum tum sextum & quinquagesimum, Philippus vix trigessimum, cum omnium Belgii prouinciarum euocatis Magistratibus, in magna, magnorum virorum & legatorum externorum frequentia, in illo Bruxellani Palatii amplissimo theatro graui, & non sine lachry-



ne lachrymis præmissa oratione, hæc quæ diximus  
regna & prouincias gubernandas, Vnigenæ huic  
filio demandauit, & ipse in religiosam solitudinem  
vltrò secessit, siue quòd gubernandarum molesti-  
arum pertæsus iam fuerat, siue quòd vagam & vo-  
lubilem vulgò appellatam deam fortunam, ab Oe-  
nipontana fuga, & Mettensi oppugnatione irrita,  
saltatorium suum orbem, quòd minùs sælicitatis am-  
plius aliquid sperare posset, vertere iam viderat,  
siue quòd tantæ administrationi publicæ, minùs  
ob valetudinem idoneum se fortè agnouerat.  
Quæ vna omnium res magno habetur in principi-  
bus argumento prudentiæ cuiusdam perspicacis.  
Si enim in priuatis lusibus, quantò magis in publi-  
cis muneribus summi est iudicii, sælicitatis & in-  
fælicitatis suæ vices maturè cognouisse, & sene-  
scentem, quod aiunt, equum tandem soluuisse.  
Quanquam vel in ea ipsa de qua dixi religiosa so-  
litudine, cùm in quodam monasterio S. Iusti in  
Hispaniis degeret, nihil minùsquam abiectionem  
aliquam animi præ se tulisse videbatur. Nam &  
huic eidem filio Philippo, post victoriam ad S.  
Quintinum de Gallis partam, num si duces deef-  
sent opera sua vti vellet, significauerat, & omni-  
bus ad eum in monasterium diuertentibus eximiã  
pro sua virili parte liberalitatẽ semper ostenderat,  
& cuidam Capuano illustri viro donatis, à pran-  
dio ad quod illum secũ assidere voluerat, aliquot

aureū nummū millibus, hæc inquit pro Cæsare parua, pro Carolo Austrio sat magna, grato accipe animo, fortè subintulerat: quæ omnia vt ante renunciationem, sic & post renunciationem imperii magnum Caroli v. animum proculdubiò arguebant. Aderat tum in renunciatione illa, Maria Hungariæ Regina ipsius soror diu ante Belgarum prouinciarum gubernatrix. Cui Cæsar solennibus gratiis pro nauata egregiè opera actis, Philibertum Sabaudia Ducem, quod non nemini admirationem mouit filii nomine, vt quoque assedisset compellauit. Ipse quidem in editiori loco positus, Philippus verò filius flexis coram patre genibus, Grauellanus Cancellarius, qui diploma illud quod vulgò cessionis dicebant, alta voce prælegebat spectabantur. Quibus ad eum modum sollemnissimè absolutis, pater cum filio inter festos ludorum dies aliquo consumpto tempore, & duabus sororibus quæ regibus olim nupserant secum acceptis, in Hispanias nauigauit, nonnullis arcanis imperii priùs filio communicatis: quorum paria aut certè similia scripto comprehensa, quæ Augustæ Vindelicorum grauius ægrotans, cum visurum se filium non amplius crediderat, decennio ante exarauerat, vulgo etiam nunc circumferuntur. Habent illa multa quæ præsentium rerum & temporum statui minimè quadrauerunt, sed nihilominus tamen ad omnem posteritatem erunt argumento



gumento magni illius Cæsaris constantis in Deum  
& Rempub. voluntatis, quæ quoad eius fieri po-  
tuit, diligentius filius obseruauit: nempe vt in  
multis pauca referam, Deum vt timeret, religio-  
nem auitam per omnia Regna & prouincias suas  
sanctam totamq; conseruaret, Tridentinum Con-  
cilium continuandum curaret, idoneos & spectatos  
viros Ecclesiasticis muneribus præficeret, oppi-  
gnoratas à se vrbes & regiones, quoad eius fieri  
citiùs posset, ære alieno eximeret, quinquennales  
cum Turca inducias à se pactas seruaret, nuptias  
quoties opus esset ob procreandam sobolem ite-  
raret, Ferdinandum Regem patrum vt patrem  
coleret, Gallis nec hostibus neque hospitibus vte-  
retur, Paulo iij. Pont: Max: eum quem par esset  
honorem deferret, sed res suas non temerè crede-  
ret, Cosmum Medicem Florentiæ Ducem amaret,  
Ferariens à se non alienaret, Mantuanum propter  
Cardinalem & Ferdinandum eius patruos, & pro-  
pter affinitatem nouam ineundam amplecteretur,  
Ianuenses propter insulas Maioricam & Minori-  
cam & Sardiniam, Senarum urbem & Luceñ pro-  
pter Imperii Romani in eas iura quietas esse pa-  
teretur, Venetos humanitate, Heluetios ære in of-  
ficio retineret, classem semper instructissimam si-  
bi esse omni ratione curaret, Hispanicas cohор-  
tes, si quid interim illi humanitus accideret, Nea-  
poli Mediolanum deduceret, & si quid fortè in

cum Galli tentare vellent, primos eorum impetus fortiter ferre, & nec iniuriam illis facere, nec illam pati meminisset. Inferioris Germaniæ prouincias, à nemine externo Principe gubernari fineret, & in sanguinis adeò sui principibus magna ratione & delectu vteretur, Indias populas indies efficere magis & æquabilitate iuris ac iustitiæ curaret contineri. De rectoribus Prouinciarum ne parum neque multum vulgi sermonibus crederet, sed eorum nihilominus actiones & consilia diligenter notaret & obseruaret. Ducem Sabaudia & eius filium, qui magnam calamitatem ipsius causa passi essent, benignè semper complecteretur. Verumtamen belli Gallici mollem omnem eorum gratia in se non deriuaret, nisi fortè gerendi contra eos belli opportunitatem magnam perspiceret, & pariter ab Anglis infestari ipsos intueretur, Quos quidem Anglos suarum partium semper sibi vellet facere, sed absque vlla vel minima suspitione auitæ religionis immutandæ. Hæc multa; alia pii patris monita quoad eius fieri diligentius potuit Rex iste vt diximus obseruauit. Fames interim maxima cunctam inuaserat Germaniã, quæ durate idem Philippus paternæ bonitatis æmulus, in aliorum vsum frumentis aliunde importatis, multa hominum suo sumptu millia liberalissimè sustentauit: Nulla quippe maior habetur magnificentia, quàm in summis opibus, summa; rerum omnium



omnium copia pauperum non obliuisci ægestatis.  
Iam verò cū non ita multò post graues ipsum  
exceperent motus, incredibile dictū fuerit, quan-  
to perè eum exercuerint & ab otio ad negotium  
traduxerint. Fatendū enim est quod obscurari non  
potest, hūc Philippum Hispaniarum Regem paulò  
elato ingenio & supercilio principio fuisse: cū  
quidam adulescentes, domestica iuuenum principū  
pestis Carolo v. patri anteferre eum non dubita-  
rent, quòd è Cæsare, patre Rege natus ille fuisset:  
quibus tanquam Syrenū vocibus captus, cū sibi  
ipse nimium placuisset, aliquando Alberto Mar-  
chioni Brandeburgico manum non porrexit. Qua-  
re offensum increpassse ipsum ferunt patrem, quòd  
quibus ille sociis & rerum suarum quasi quibus-  
dam vteretur instrumentis, hos ne illo quidem  
honore Philippus dignaretur. Sed nunc secundæ  
nunc aduersæ nos erudiunt magis res, & sicuti va-  
letudo grauibus superatis morbis iucundior, sic &  
virtus in arduo fit illustrior. Quod in hoc vno Hi-  
spaniarum Rege adhuc ante mortem patris, qui  
non integro biennio in illa religiosa solitudine vi-  
xerat, licuit cognouisse. Nam primū quidem  
contra Paulū iij. Pont: Max: qui Gallorum regis  
Hérici ij. exercitū Guisio duce regni Neapolitani  
causa occupandi, cōtra eum euocauerat in Italia,  
mox & cōtra eosdem Gallos in Belgio se suaq; vi-  
disses tueri non magis foeliciter quàm etiam ani-  
mosè. Om-

mosè. Omnia enim gubernaculorū principia paulò sunt duriora, & cessante præclare meriti parentis obseruantia acrioribus studiis & vigilantia pro se cuiq; filio expedierit tueri dominatum. Procefferant tum in Belgio Galli opinione iam longius, & quantumuis licèt alieno anni tempore, hyeme in castris diu versati Artesiam diuexabant. Quibus Philibertus Sabaudia Dux, cum instructo exercitu, à Rege obuiam ire iussus, ad oppidum vulgò S. Quintini dictum de improuiso diuertit, & castra ibidem sua scienter ac prouidè collocauit. Quo loci Henricus Gallorum Rex hoc nomine secundus, Mamoransium senem toto suo regno præcipuæ auctoritatis Ducem, valido cum exercitu, ineunte iam vere, denuò submisit. Quem adulta iam messe, commeatum inuehere in oppidum volentem, cùm Sabaudus regis Hispaniarum exercitus imperator aliquoties impediuisset, tandem animis vtrinq; exacerbatis ad generalem conflictum est deuentum; plerumq; enim maioribus leuiora prælia præmittuntur. Quo quidem ipso loco eo euentu pugnatum est, vt cùm Gallici Germanicorum Catafractorum equitum impetum non sustinuissent ( qui tum primùm Erico Saxoniae & Gunthero Suarzemburgio Ducibus in maiori quàm vnquam antea precio haberi, & vulgò equites atri appellari sunt coepti ) & Hispani pedites Gallicanorum sclopettariorum cohortes ce-



hortes celerrimè sclopettis disiecissent, Momarā-  
sio Comitestabili, & Ludouico Gonzaga post Ni-  
uernē Duce, Raingrauio item & aliis pluribus  
magni nominis captis, Philippus Hispaniarū Rex  
memorabili victoria de Gallis potiretur, ipso die  
S. Laurentio sacro. Ad cuius rei sempiternam  
memoriam, & grati sui animi erga Deum Opt :  
Max : testificandi ergō, Monasterium vulgò Sco-  
rial dictum admirabili opere & immenso sumptu,  
ex eo statim tempore vt vouerat, ædificare cœpit,  
& ad eam amplitudinem & magnificentiam qua  
nunc spectatur, stupendis & diuturnis susceptis la-  
boribus & infinitis profusis facultatibus tandem  
perduxit. Par enim est admirabilis raritatis Re-  
ges, paria nominis & pietatis suæ signa monimen-  
taq; reliquisse. Sed nondum ea tam graui & peri-  
culosa pugna Gallorum Rex fractus, suorum du-  
cum & militum quàm plurimis desideratis quieui-  
se videbatur, resumptisq; paulò post viribus nume-  
rosas denuo copias ad Ambianum eduxerat; cū  
adeò Rex Hispaniarum ipse exercitu ducto in ex-  
peditionem se fortiter illi opposuit & ad accipi-  
endas conditiones pacis ipsum adegit. Quæ ni-  
mirum pax cruenta & diuturna bella inter Hispa-  
nias Galliasq; tranquillarat, accedente maximè  
nouo illo connubiorum nexu, quo Philippus Rex  
regis Galliarum filia & Sabaudus sorore in matri-  
monium ducta, coniungi tandem Gallis se non

inuiti permisērunt. Tractata ea est pax diu, nunc  
his nunc illis intercidentibus rebus & dubitationi-  
bus, nec nisi victoris regis in victū maiori quadā  
auctoritate & opinione potentiae stabilita poterat  
coaluisse. A qua Philippus iste in imperii & guber-  
naculorum suorum auspiciis initiis, & vno ferè eo-  
dēq; anno tribus in locis Gallorum exercitibus pro-  
fligatis, & exquisitissima pompa exequiis Bruxellis  
patri peractis, quarum similes Ferdinandus frater  
Augustæ in comitiis & Sigismundus Augustus Po-  
loniæ Rex Petricouiæ in suis celebrauerat, in Hi-  
spanias nauigauit. eo quidē exitu, vt si S. Sebestia-  
ni quem vulgò vocant portū tempestiuè non atti-  
gisset, præ maxima quæ subsequuta fuerat sequēti  
nocte tempestate, actum proculdubio de ipso fuisset.  
Verum cum omnibus Angelos custodes, tum  
videlicet vnctis suis dedit Deus fortiores. Nec mo-  
ra cum Elizabetha Henrici Galliarū regis sorore,  
quam ab illa pace in matrimoniū accipere spopō-  
derat, magnificentissimo apparatu Toleti nuptias  
celebrauit, & mox à gaudio, ad mœstitiā re subito  
prolabente, de eiusdē regis nec opinata à quodam  
ludicro certamine morte nuntium accepit. Nihil  
enim in gaudiis humanis certum, & quod afferre  
potest interitum, in hoc ad mouendum risum non  
temere præbueris te spectandum. Ab eo Henrici  
Galliarum regis obitu, horribiles primū quidem  
in Galliis demum etiam & in Belgio excitatæ  
sunt tur-



sunt turbæ & seditiones, quæ non nisi & graui sum-  
ptu, & longa mora, & dubia cura poterant trauquil-  
lari. Ac vix interim credidisses, quàm in diuiso &  
ad ruinam præcipitato vicino regno, quod ipsum  
maioresque eius exercuerat, & non difficilè occu-  
pari ab eo poterat, Rex Philippus fuerit modera-  
tissimus, & tantùm abest vt hostem vt etiam  
rum necessitas tulerat ipsius egerit defensorem.  
Quibus haud dubiè etiam maiora illis & alibi pro  
Christi gloria & Christianorum salute præstitisset,  
si partim Turcica hostilitate, partim sociorum ma-  
lignitate, partim subiectorum rebellione, à pio in-  
stituto reuocatus non fuisset. Est enim certissimum  
illo eodem ferè tempore ob ducum suorum, quorū  
maior & potior pars in captiuitatem Turcicam  
venit, ingentem duce Turcarum Darhute cladem  
ad Zervas pati, & paulò post, ob Siciliam Melitam  
insulam immensis dispendijs defendere necesse eū  
habuisse, & nihilominus tamen laboranti Gallia  
nunquam defuisse, ac postremò Petro Ernesto  
Mansfeldio Comite Duce validas auxiliares copi-  
as, ad Moncotorum Galliarum Regi submisisse, vt  
verè Catholici re & nomine regis contra hæreti-  
cos officiū expleffet, & pariter se suaq; tecta à vi-  
cino incendio defendisset; omne enim malū vici-  
no malo fit auctius, & quod exilibus progressibus  
fuerit tensum, nisi maturè extinguatur excrescit in  
immensum. Erat quidem non nemo, qui orienti-

bus Belgicis motibus præcipuæ illarum prouinci-  
arum auctoritatis viros liberaliter ære alieno li-  
berandos, quàm scueritate animaduersionis ad  
officium adigendos regem potius hortabatur.  
Omnes enim qui malè sedent, locum mutare auēt,  
& non tam ratione aut consilio, quàm repentino  
impetu & aliquo alicuius nominis Duce vulgus  
mouetur. Nec deerat sanè hac in parte Rex, tam  
sibi quàm etiam suis vllo modo, & nunc Egemon-  
tano Comiti, nunc aliis ad aulam suam venienti-  
bus, quàm potuit maximè regium animum & be-  
neficientiam declarauit. Sed præ foribus procul  
dubiò tempus iam illud fuerat, quo veteribus  
quorundam flagitiis ita exposcentibus, diuinitus  
punitio noua debebat prouinciæ irrogari. Facit  
enim iusta Dei Opt : Max : indignatio, vt quamli-  
bet non peræquè peccauerint omnes, communi  
nihilominus interitu scelera in omnibus casti-  
gentur. Ventum igitur ad illas vstiones sectio-  
nesq; est, quibus primùm Albanus Dux in Belgio  
cum imperio veniens Aurancio fortè elapso Ege-  
montano verò & aliis captis nonnullos aurei vel-  
leris equites & complures alios nobiles extremo  
supplicio non dubitauit affecisse; siue quòd à Phi-  
lippo rege in commissis id habuerat; siue quòd in  
Egemonthanum Comitem, ob quædam verba, de  
Mettenfi oppugnatione irrita in se iacta vetus odi-  
um (vt ferunt) conceperat; siue quòd ita rerum &  
tempo-



temporum illorum statui ipsius opinione fortè expedierat. Ad Maximiliani quidem Cæsaris aures, vt eius rei peruolauit nuntius, turbatus est aliquantum; & quoniam Opersdorfii ad Danubii ripam non procul à Vienna versabatur, Suendio officii causa ad ipsum veniente, & quid de Belgicis nouis sentiret percunctante, ne Danubium quidem illum sanguinem restincturum esse clarè respondit, & verè. Omnium enim parcè, sed procerum parcissimè sanguis fundendus. Nam quid ab his similibusq; gestis subsequutum fuerit mali res postea declarauit, cùm Albanus vt sanguinarius Dux habebatur dubiæ curationis morbos ad deterrèdos alios violenta remedia protinus adhibenda, & non modò regium thesaurù absorbendum, sed & pauperum sanguinem exsugendum non dubitaret. Qua ipsa re, sic profectò offensus Rex Hispaniarum fuerat, vt cùm aliquando, quod infra dicemus, ob quoddam factum Albano irasceretur, etiam effigiem ipsius ex Palatii penetralibus per fenestram deiiciendam imperauerit; vnde quidam colligunt ipsius regis mentem alienam ab eo consilio semper fuisse; sed cùm secus quàm speraueris res ceciderint, vix aliquis confitetur eius rei fuisse se autorem, tametsi in negotio tam anticipis contentionis atq; lubrico, lapsum esse, ipsum etiam veteranum ducem qui prodigii loco habeatur; semper enim quàm ante à prætorio prætorem in

suo consideratior fit magistratu. Distat longè ab Hispaniis Belgium, & seditione nec opinata in prouinciis oriente, non modò illarum prouinciarum seditiosos ciues, sed & omnes promiscuè suspecti habentur indigenitales. Quò partim aperta ignoratione veri, partim nimia cupiditate domini, partim suppressa voluntariè apud se notitia rectori, ii qui rebus præsunt in auia aguntur præcipientes, & semel errore facto, nec propter obstinationem superbiamq; emendato, in multo maiora grauioraq; mala indies vehementiùs prolabuntur. Multò autem etiam experiuntur id magis, cùm contemptu gentium omnia expugnata facilia sibi proposuerint, & cùm tum arte tum natura munitissimæ arces & vrbes occurrerint iis expugnandæ. Ex multis enim quæ videbantur imbellibus gentes & nationes plures vsu & necessitate armorum tractandorum pugnatissimæ extiterunt. Quâquam in rebus iis nec aliquid certi, neq; potest esse diuturni; & foelicitas aliquos ad tempus adimatores, rebellio omnes ad omnem perpetuitatem sui habet oïores & contemptores. Quò magis huius tam diuturni & obstinatissimè belligeſti cum subiectis nomine, hunc optimum & sapientissimum Regem si aliquis taxare fortè voluerit, næ haud omnia ipsi, sed partim ministrorum, partim etiam subiectorum partem aliquam, animi adscripserit impotentia, quorum illis se committere, his haud ita



haud ita fidere habuit necesse; qui Deo Opt:  
Max: primùm mox & Regi suo rebelles facti quò  
minus religionis Catholicæ & patrimonii sui de-  
fertor videretur, ad tot tamq; immensos sumptus  
belligerando profundendos aut potiùs in gloria  
Christiani & Catholici nominis collocandos ade-  
gerunt. Egrè enim stationem deserit, qui re & no-  
mine Catholicum Regem se professus tuendam  
susceperit. Accedebat quod præter quòd hæreti-  
corum peruersis conatibus irritatus, Carolo vni-  
gena filio viginti ferè annos nato, spe vnica Regni  
amisso vehementer indoluerat, qui blesus, clau-  
dus, & gibbosus in hãc lucem editus, interfecta vt  
diximus in puerperio matre, de patre quoq; è me-  
dio auferendo vt ferunt cogitabat. Solet enim na-  
tura plerumq; tales foetus ostendere corpore, qua-  
les ingenio & habitu fuerint interiore. Qua de  
ipsius mente, ac in Rempub. ipsumq; se volunta-  
te, cùm ad Pium v. Pont: Max: aliosq; præcipuos  
orbis Christiani principes, Philippus Rex præscri-  
pisset, & quid de vnigena illo filio tot tantorumq;  
regnorum hærede statuere debuerat, sententias  
eorum exquisiuisset; tandem quomodo mortuus  
sit incertum est; illud autem certissimum, quòd  
cùm Ruigomes summus Palatii eius præfectus ad  
ipsum venisset & quædam præfatus fuisset, ad la-  
chrymas eum prouocauerit, cui Epitaphium mor-  
tuo, Hispanico rithmo tale scriptum fuerat:

*Naci*

*Naci de Aguelo y padre sin segundo  
De tantos Reynos Principe heredero,  
Enchi de miedo y de speranza el mundo  
Iouen ardiente de animo guerrero.*

*Muerte en vn puncto puso enel profundo  
Las sperancas de tan alto aguero.*

*O Suerte humana quien enti confia ?*

*Ay er fui Carlo de Austria, oy tierra fria.*

*Quod sic Latinè fortassè redderetur :*

*Natus sum ex auo & patre absque secundo  
Tantum Regnorum Princeps atque haeres,  
Impleui metu & spe mundum,  
Iuuenis ardens, animi bellicosi.*

*Mors in vno puncto, posuit in profundo  
Spem tam alti augurij.*

*O sors humana quis in te confidit ?*

*Heri fui Carolus de Austria, hodie terra frigida.*

Pater quidem nec hoc tam inopinato & acerbo  
filii casu, nec aliis aduersis pluribus, vt potè maxi-  
ma à Darhute Turca illata terra mariq; suis clade  
nec Oranum versus ob Assan, Barbarossæ Regis Al-  
ligerii olim filii in Africam aduentu expeditione,  
nec Beticæ ob linguæ Arabicæ & vestitus inhibi-  
tū vsum, qui magnis thesauris cōstitit motu, nec  
postremò Melitæ Insulæ ob Siciliam defensione;  
neq; Galeta à Turcis capta, de pristino animi vigo-  
re & statione poterat deturbari. Est enim verè ma-  
gni & magnifici Regis, vt stupendis extruēdis ope-  
ribus, sic



ribus sic & infestissimis quibusq; casibus fortiter  
probari perferendis. Emortua iam Elizabetha  
Philippi Regis coniunx fuerat tertia, qua triduo  
post sepulta, ad Mariæ alterius Maximiliani Cæ-  
saris filiæ, paterni consilii memor, nuptias prope-  
rauit. Necnon & Carolus Galliarum Rex Chri-  
stianissimus, ad Catherinæ eius sororis alterius,  
quas statim à Spiren comitiis cum illustri comita-  
tu Cæsar ad maritos allegauit. Quo eodem quoq;  
tempore, Rudolphus modernus summæ gloriæ &  
virtutis Cæsar, cum Ernesto fratre, ex Hispaniis  
ad patrem rediit, & non nemo solitæ Austriaco-  
rum Regum amplitudinis osor, Maximiliano Cæ-  
sari tantū foelicitati fortè inuidit, quòd post Mi-  
stelbachium quendam ditissimum imperii Comi-  
tem, qui Orientis vnā Occidentis Cæsari filiam  
elocarat alteram, nemo illo augustiùs filias elocaf-  
set. Verùm in rebus humanis, nihil vndiquaq; be-  
atum neque perpetuò fluens ad nutum, admodum  
fuerit diuturnum. Nam & illud quidem Regis ex-  
tremum connubium, non admodum in Hispaniis  
magno cummulabatur gaudio, tum ob Mathiæ  
Archiducis Austriæ Reginae fratris in Belgium nec  
opinatam profectionem, tum morientibus aliis  
atq; aliis Philippo liberis, & in primis grandiori  
natu filio Ferdinando cuius immaturum obitum  
vt dolenter tulisset, datis tamen per illa sua Regna  
& prouincias litteris, publici luctu significatione

aut pompa aliqua eius funus cohonestari noluit & in magno dolore magnam moderationem animi præ se tulit, nihil enim est difficilius quàm iustum in se gemitum, casu aliquo recenti & repentino inhibere. His ita gestis in Hispaniis rebus, Selimus hoc nomine secundus Turcicus tyrannus, Cyprio regno Venetis perfidiosè erepto, toti adeò Italiae ipsique orbi terræ ferrum & flammam exitiumq; minabatur. Ad quem reprimendum Pio v. Pont: Max: socialis foederis inter aliquos Christianos Principes auctore, idem Rex inuitabatur. Quo nimirum in societate armorum veniente, eiusq; Ioanne Austrio summæ virtutis iuvene fratre, non modò interesse verùm etiam præesse bello annuente, illa tam atrox post homines natos ad Naupactum secuta est pugna, qua Christiani de Turcis memorabili potiti victoria, utinam ita uti ea scire quàm barbaros voluerunt deuicisse. Non minus enim laudabile fuerit, victoria scienter de inimicis uti quàm fūdere fugareq; inimicos. Sed ut plerūque fit foelicioribus progressibus initio factis, sensim sine sensu languescit industria, & nec opinantibus ex vnis alia suggerit Mars certamina impotenter. Per id tempus vltimus Regum Lusitaniae palmes Sebestianus Rex Portugaliae occisus fuerat, cū contra Machometanos in Africam cum exercitu profectus, animosius quàm consideratius depugnasset. In-



set. Inter cuius maiores & Castellæ siue Hispaniarum reges, cùm perpetuò semper viguerint similitudines, simulq; affinitatibus & necessitudine interdum etiam iungerentur, Philippus eius Regni adipiscendi talem tamq; opportunam occasionem minimè sibi prætereundam ratus, primùm quidem iuris iustitiæque consultos, ad iurium discutienda dubia consilio suo adhibuit, mox & arma ad illa tuenda expediuit: Regnis enim qua ponderentur statera, & regibus quibus diiudicentur iura nunquam non defuerint. Fuit tum Ferdinandus Albæ regulus veteranus Caroli v. & eius Philippi filii exercituum Dux, ob sua suorumq; non omnia omnium optimè gesta, in honesta quadam decentis custodia, ex qua ingruente illo Lusitanico bello, in libertatem positus, summæ rei & militiæ Regio iussu præfuit imperator. Vidisses interim quàm magna & subita rerû fit conuersio; cùm prægnâs necessitas alicuius magni viri exposcit industriam, & bello aut Repub. obeunda auctoritatem. Non enim tam citò summum illud imperium Albano Duci delatum fuerat, cùm ab eo, quem paulò ante exosum, & effigiem ipsius ex Palatio Regio videras deturbatam, vim vi vincentem, & Lusitanorum rebellionem agnouisses castigantem. adeò chara & preciosa est virtus, vt etiam alienissimos animo sui æstimatores, vt serò, seriò quidem æquiores sortiatur. Quem octogenarium senem bifur-

cata barba alba, albo equo vectum, eum tam nobilem de Lusitaniæ regno triumphū, quem maiores ipsius magis desiderare quàm consequi poterant, regi suo alicubi conspexisses gratulantem, sic magistratus virum, & locus ac tempus declarat magistratum. Neq; tamen adeò multo post, eandem illam quam & ante Albanus Dux expertus Regiam est indignationem, si indignatio dicenda, quæ veteris offensæ memoria, iusto dolore concitatur. Benefactis enim nunquam perperā gesta humanitus abolētur. Debebat is sibi in aliqua qua voluisset domo honestā custodiā in aula elegisse; quam cum fortè quæreret, incidit in eius domum quo lictore in Belgio •cū bellum gereret utebatur. Diuina quippe nemesis fugientes sequitur, & nemo præter culpam diuinitus castigatur. Patienter tamen illa fortunæ tela omnia, Dux Albanus tulit, & puteum Pharaonis sanguinariumque Ducem appellari vulgò se non semel audiuit, vt magnus & memorabilis & multarum diuersarūq; regionum bellis gerendis imperator secus quidem populorum prouinciarumq; rector extitisset. Qui quantò quidē beneuolentiā Regiam aucupari magis voluit, tantò & quasi etiam vehementiùs eius à se animū semper alienauit. Potentes enim rarò rogati, nec priusquam sua aptè prius recollecti ab iracundia desistunt. Quod vel inde quoq; collegisses, cū auleta quædam in Belgio affabre texta  
donare



donare Albanus Regi sapius conatus fuisset, & Rex illa contempsisset, nec ex sanguine suorum populorum partū habere quicquam velle respondisset; ille nihilominus vt in templo quodam quod inuisurus Rex fuerat affigerentur, per quosdam frustra licet postulauit. Verū ad propositum reuertamur. Nam ex quo tot tantisq; procellis & tempestate iactatum portum capere non posse optimum regem licuit cognouisse, disquirere certē malis remedia ea quibus curari potuissent haud dubiē etiam oportebat. Erat in Belgio Comes Nassouius Auriacæ Princeps patriæ suæ fax & incendiū non iniuria dictus, qui apud Carolū v. Cæsarem & hunc Philippū eius filium à teneris educatus, cū malam pro meritis gratiam impotenter retulisset, omnem à Rege Belgicarum prouinciarum cupiuit auellere principatum, & nunc Mathiam Archiducem Austriæ Cæsaris, nunc Valesium Alancomum Ducem Galliarum regis fratrem, siue id feriō, siue dicis tantū causa faceret, eius constituere dominum non dubitanter cogitauit. Quidam enim qui per se ipsi nocere non tanto opere possunt, immiscent alios suæ quam semel animo conceperint leuitati. Sed & Galli nullo (vt leuissimē dicam) factō operæ precio, ex Belgio in Gallias reuersi sunt, & Aurancius eiusq; similes plures tanquam ad scopulos allisi, hoc Dei beneficio saluo & incolumi Rege cuncti adeo perierunt. Er-

enim & Aurancius ipse à Rege Hispaniarum proscriptus, mox, & percussori ipsius veterum quorūdam Imperatorum exemplo, magno proposito premio semel & iterum globo frustra petitus ad extremum est interfectus à quodam, qui illa die primum sclopetum exploserat patriāq; tyrannum occisurum se receperat. Quod cum non minis nauiter quā animosē executus fuisset, repentina fuga quā eum in tumultu prodidit salutem quārens fortē captus, & per omnes omnium generum quos in magno animo tulit excarnificatus mortuusque est cruciatus. Mors namq; pro rege & lege vel acerbissima obita, non mors sed vita potius est censenda. Neq; tamen Gallici & Belgici motus sedaciores propterea facti sunt, aut rebellium contra Regem suum infesti animi à proposito destiterunt. Rebellaerat inter vrbes Belgicæ alias nobilitate Emporii clara admodum Antuerpia, quā ad officium reuocanda, quas non adhibuit tam urbanas quā militares artes, Aloysius Dux Parmensis & eiusdem regis Belgicarum prouinciarum gubernator, sic vt voti sui compos tandem factus, & triumphantis instar urbem ingressus, dimidio minore quā quæ ex pactione promissa fuerat, accepta à ciuib; pecunia, non modò ordinum sed hominum omnium animos mirificē sibi conciliauerit; largitas enim plures, sed maximē gentium & exercituum decet rectores. Quæ res nescio quam  
quam



quam appetundi regni suspensionem, ob Lusitaniam, in qua iuris aliquid habere se etiam prætenderat, perditam vulgò ei conflauerat, tametsi subsequentes hominum actiones, quid de præteritis iudicandum fuerit reddunt testatum. Accenso quippe paulò post à morte Henrici Regis Galliarum bello, Hispaniarum Catholicus Rex, Catholicis qui ipsius opem implorabant, nihil minùs quàm deesse voluit, nec vlla alienorum occupandorum cupiditate vel ambitione ductus, sed sola Christi gloria & populorum salute accensus contra Henricum tum Nauarræ nunc Christianissimum Franciæ Regem eundem illum Parmen, in peniciora Gallici regni, cum exercitu misit, qui rebus cum admiratione gestis, deleta apud omnes falsa de se suspitione expectationem etiam superauit. Tum enim re ipsa bellum aliquis gesserit, cum in hostico & contra sui similem administrauerit illud Ducem. Quod non solum in Parmen sed vel in hoc ipso quoq; Philippo Hispaniarum Rege videre licuit, quando ad Annanum Gallis ipse se opposuit & in Lusitaniã cum exercitu proficisci non dubitauit. Bonum enim est acri consilio, sed non minus animi vigore constantiaq; polluisse. Quæ qualis & quanta in hoc sene fuerit, vel illud quoq; in multis testatum fecit, quod contra Elizabetham Reginam Angliæ, ab extremis Hispaniæ oris classem miserit, & omnia quæq; tentare non dubitauerit, quan-

quanquam partim hostili partim tempestatis vi  
ea disiecta, magna ex parte perierit, & in varias or-  
bis terrarum regiones milites classiariosq; eius  
deportauerit. Consilia enim rerum gerendarum sa-  
lutaria ipsorum quidem Principum, at vnus Dei  
Opt:Max: præstare est euentus. Iam Parmen Duce  
mortuo, qui omniū sui temporis ducum vt ætate  
fuiſſet minor, æquauerat proculdubio superiorū e-  
tiam gloriā, paulò post à Fontani Comitibus in Belgiū  
aduētus, Ernestus Archidux Austriæ, Rudolphi Cæ-  
saris frater, etiam superuenit, summa cum ea qua  
viginti ante annos venisse eum expediuiſſet pote-  
state, tum quidem nec iam cum valetudine nec ad  
res gerendas occasione pari, ipso etiam Hispani-  
arum Rege nunc grauissimo articulari morbo, nūc  
motibus Aragoniæ, & nunc his nunc aliis diffi-  
cultatibus vehementer implicato. Quos ipsos  
Aragoniæ motus, quantumuis licet imbecillus  
corpore, magna animi & consilii sedauit firmita-  
te; & si quid antea in pace armatus, tum in armis  
togatus præclara edidit exempla prudentiæ & for-  
titudinis suæ singularis. Cū poenam rebellionis  
ad paucos, metū pertinere ad omnes non dubitan-  
ter voluisset; omnis enim rebellio aut ad tempus  
dissimulanda, aut paucorum subita poena acriter est  
coercenda. Sed & Ernestus ille ipse Archidux  
Austriæ non diu superstes in Belgio fuit, & frater  
eius Albertus S.R.E. Diaconus Cardinalis, ab hoc  
Rege



Rege ex Hispaniis missus, in ipsius locum cum imperio successit. Mirum autem dictum est, ut virtutis, quam vel ipsius cursus ætatis, sæpè videatur magis expeditus. Etenim ut natu fratrum fuerit minimus, minora certè industriæ suæ exempla non dedit; sed ut diu fieret senex, senem quod aiunt maturè agere voluit. Ac primùm Vlix bona contra Anglos, mox & Belgio tuendo, nomen genusq; suum æternitati consecrauit. Cœpit is Caletum primùm, quod cum sub Philippo Galliarum Rege olim Angli eripuissent, tandem hoc Philippo apud Anglos regnante Galli recuperauerunt, vtriusque autem gentis errorem Austriaci correxerunt. Nolo hoc loco immorari diutiùs, & tam Cardinalis cuius obiter facta est mentio, quam ipsius omnia dicta & facta cōmemorare Regis, qui ne tot tantaq; referam alia, ut prudentiam suam sanè illam perinsignem aliquando testaretur, Ianuensibus quos ex egentibus diuites fecerat pro pretiosissimis quibusdam peristromatis sibi oblatis, pecuniam intemperantiùs flagitantibus, & quòd ipsius Regis causa tantis sumptibus confecta essent affirmantibus, si mea inquit causa, ostendant & insignia acutissimè responderit; & quando moderationis animi testificandi ergò, de Scouedo quodam suo intimo occiso, cum chartis pictis fortè luderet audito nuntio, haud ita commoueri visus est impotenter; sed num in aula sua defutura etiam esset iustitia, qua-

F

stitia, quasi aliud quid agens quæsierit. A repentinis namq; perturbationibus animi, non dicam factu incredibilis, sed difficilis admodum est receptus. Quid illud quod cuidam, qui per speciem supplicis libelli exporrecti in vallem Iozaphat ad iudicium extremum pro quadam iniuria sibi ab eo ut dicebat facta ipsum citauerat, ex fuga retracto dixerit: Hæc verò inquit fuga, æquitatis contra me tuæ, & non omniū optimæ fiduciæ fuerit argumentū, sed tu videris, per me siue iure, siue iniuria, quod impotēter sequeris assequāre; & iussit ei omnia illa quæ petierat concedi, ut magnanimitatem suam, & hominis leuitatem declarasset, & cū quidam, quod Scorialium ut vocant Monasterii desiderio tantopere teneretur secretò notare ipsum voluisset, ideoque librum quendam totum litteris vacuum, cui vnum illud, quod tandem Scorialium Monasterium petiturus esset inscriptū fuerat fortè ei obtulisset; ille eo inspecto nihil aliud, quàm contractis humeris, utinam inquit etiam citò, quàm moderatissimè subintulit. Iam cū & alter, quod à primæuo illo parente Adam latius longiusque nemo eo regnasset in aures ipsius influere voluerat, blandimenta respuens, prorsus nihil responderit, promptus alioqui & præacutus semper artificio differendi. Nam cū Albertus Criskius, Regis Poloniæ legatus, aliquando Bruxellis, Barensem & Rossanè principatum ab eo  
sibi resti-



sibi restitui fusiùs liberiusq; flagitasset, illeq; num  
iure iusteq; sibi id deberi, an verò etiam ex beni-  
gnitate sua concedendum potiùs existimasset, per-  
cunctatus ab eo fuisset, Oratore nihil nec prece  
neq; precio obtinere velle se respondente. Bene  
habet inquit; Neapoli ergo, in quo regno Ducatus  
illi continerentur, vter nostrum ius rectius ha-  
beat iure experiamur. Quod vt magno magni Re-  
gis legati animo & prudentiæ adscribi videatur  
debuisse, Sigismundus quidem Augustus Poloniae  
Rex, non ægrè se illa carere potuisse nonnunquam  
commemorabat. Summi enim Reges sibi ipsi im-  
ponunt, & non ab aliis imponi volunt leges, neq;  
tam vrgendo, quàm vel aliquid etiam de iure no-  
stro remittendo redduntur nobis æquiores. Idem  
verò Philippus Hispaniarum Rex Catholicus quã  
tenax æquitatis iustitiæq; fuerit, vel illud argumen-  
to sit, quòd primarium quendam in sua aula vi-  
rum à Sancto officio (quod in Hispaniis vocât) ad  
comparendum vocatum vt iuri iustitiæq; se siste-  
ret, nescio quid sibi maximè necessarium mini-  
strantem & tardantem, ire confestim iusserit. In  
labore patientia fuit tanta, quanta potest esse ma-  
xima, vt potè qui diebus ferè singulis, plures ho-  
ras ipse manu sua scripserit, dictauerit, legerit, di-  
scusserit & terminauerit infinita, etiam minutatim.  
Nec verò meliorem se tota Hispania, imò & to-  
to suo Imperio videri aliquem voluit, sed vt ma-

ximos quosq; potestate, sic vel inferiores anteire  
coniuncta cum modestia probitate; somni præterea  
cibi & potus parcus, in sermone fuerat paratissimus.  
In orationibus ad Deū Opt: Max: integrā  
noctem impiger aliquando transmisit, præsertim  
vbi ad arma & sanguinis effusionē res debebat de-  
uenisse. Multa non necessariò verba facientem a-  
liquem, cum molestia audiuit, & lingua Hispanica  
cū maternā quā ille intellexisset melius nosset  
utentem, ut sua potius vteretur, humanissimè ta-  
men hortabatur. Licentiam & insolentiam omnē  
maximo odio habuit; & quendam qui aduersario  
suo occurrens virgulam, quam in equo gestabat,  
luto tinctam ostendi ei iusserat, cur id fecisset quæ-  
situm, nec satis æquā causam explicantem, nulla e-  
tiā eius rei causa ipsi manifestata, ab aula sua disce-  
dere imperavit. Per risum & iocū nescio quid in  
se scriptū, quod post Cardinalem Spinosam qui  
eius fauore pollebat maximè, tota Hispania Hi-  
spaniarū Rege maior esset nemo tacitus præteriiit.  
agniturus proculdubiò verum, si auctorem scripti  
stomachabūsus quæsiuisset. Monacho cuidam, qui  
ipso non agnito structuram Scorialeñ Monasterii  
tanto sumptu erectam, apud eum improbauerat,  
non modicam pecuniam numerari in viaticum ius-  
sit, ut demum amœniora loca inuississet. Iam  
adeò liberalis fuit, ut præter Reges & Principes  
quibus immensa munera subinde miserat, familia-  
ribus & domesticis suis centena aureūm nummūm  
imò ve-

imò verò & duçenta millia, subinde donauerit, &  
non vno aut alteri sed pluribus id fecerit, quibus  
remunerandis, non priùs prædia & possessiones  
ipsas deniq; dedit opes, quàm aliquot annorum ac-  
cumulatam ex iis pecuniam pariter quoq; aggre-  
gasset, quòd diceret aridum illud videri benefici-  
um, quòd prouentus annuos sine numerata simul  
pecunia indigentibus attulisset. Ad alia verò dicta  
factaq; ipsius, & tam domi quàm foris gloriosissi-  
mè gestas res quod spectauerit, quo loco illud po-  
sueris, quòd Seneñ urbem pernitiōsa consilia cum  
Gallis contra quietem Italiæ agitantem, à patre  
coërcitā, Cosmo Medici Florentiæ Duci suo, &  
patris amico fidissimo, anno post patris in Mona-  
sterium secessum vt promiserat dare, quòd Came-  
racū sub Gallis fortiter recuperare, quòd Genuenū  
inter se dissidētes per legatos componere, & quòd  
deniq; Sabaudia Ducī, cuius pater tam præclarè  
de ipso meritis fuerat, quàm alteri cuiquam ambi-  
tiosè id expetenti filiā voluerit potius elocare, &  
quòd postremò Hispaniis Lusitania parta perpe-  
tuam securitatē, Galliis intestino bello laboranti-  
bus opportuna auxilia, Italiæ quadraginta prope  
annorum continuam tranquillitatem, cuius erat in-  
solentissima, præstiterit, in orientis & obeuntis  
solis Indiis religionem Catholicam propagauerit;  
ingrauescente ætate morti quasi proximus, omnes  
vicinos Reges & Principes foedere & amicitia si-  
bi deuinxerit, Cardinali Alberto nondum in sa-



cris existenti optimè de se merito vnicè amatam  
filiam desponsauerit, domi forisq; omnia ritè con-  
stituerit, & demum diem suum obierit piè admo-  
dum & religiosè. O Deus Opt: Max: ecquæ non  
debetur, & quæ tandem refertur tibi à nobis gra-  
tia, cuius beneficio, veluti quidam Atlantes orbi  
Christiano sustinendo, nunc & denuò suscitantur.  
Gloriabatur olim illa rerum domina Roma, qui-  
bus solis cursus iisdem regionibus imperium suum  
contineri. Quid tu Philippe Rex si viueres dice-  
res, si modò & de te & propter te tuamq; solitam  
grauitatē hac in parte aliquid loquerere? qui cū  
nihil Indiarum, nihil Persidis, nihil vltra Danubi-  
um Romani possedissent, & nihilominus tamen  
tantum sibi semper gloriosi vendicassent, tu im-  
mensis terrarum spaciis, te tuisque prolatis  
tacuisti, & demum trium vlnarum corpus vrnula  
conclusisti. Sed finis sit. Recens enim defuncto-  
rum inuidia, manes & accipitres aues semper  
infestant. Vos ego vos appello posteri, vestrum  
incorruptum iudicium, eius Regiam virtutem  
& animum vltèrius propagabit. Verū & nos  
quidem, quoad eius fieri maximè potest, me-  
mori mente ipsum colamus; & tanto vindice &  
assertore libertatis, firmo in Turcam præsidio,  
Europæ ornamento orbat, ad mutuam in barba-  
ros concordiam consensionemq; excitemur. Mul-  
ti in omni memoria magni orbis terræ rectores &  
triumphatores fuērunt; hoc ab orbe condito ne-  
scio si

scio si quis fuerit maior & augustior. Plures pluribus claruêrunt rebus; hic optimis & propemodum vniuersis. Quidam ad imitationis exemplum quàm ad veritatē historiæ inserti libris magis sūt, virtutis viam in hoc imaginē, & quasi adhuc spirātem in multorum animis effigiem patris, multi viderunt. Non nemo patrem aut auum, at hic progenitores suos omnes amplitudine imperiū & gloria proculdubiō superauit. Bellator fuit pater, at & hic pacis inter arma dominus; defensor religionis pater, ac & hic propagator; duxit pater in infidos & perfidos copias, hic & duxit & multoties profligauit. Paccatē si modō paccatē pater suos rexit, hic quoad eius fieri per infortunata tempora magis licuit, texit. Pater imperium sactum rectumq; seruauit, hic adeō ampliauit; quem nemo prosperis rebus exultantem, nemo aduersis lugentem, nemo Pannico metu correptum, nemo gaudio gestientem aspexit, nemo nisi cū semel Regis Arragoniæ cadauer intuitus esset pallescentem, nemo diu stomachantem, nemo deniq; vidit intemperantiū corrientem. Ne rursus liberalitatem eius prædicare, ne in peregrinos & exules beneficentiā extollere, ne quid Anglis ob religionem Catholicam patria pulsas. Quid Gallis? quid Germanis fecerit? quantam beneuolentiam partim ob eruditionem, partim ob integritatem vitæ, Cardinali Polo, quantam Alano Anglis? Quantam

Cardina-

Cardinali Tridentino , Boromeo , Farnesio , Guastauillano, & aliis infinitis Italis? Quantam Truchsessio & Altempfio Germanis? Quantam Hosio & quantam denique ob virtutem & scientiam militaris rei Vespesiano Gonzaga, quem ex omnibus vnum regnorum Hispanicorum proregem esse voluit? Quantam Arcensibus, Lodroniis Madrucciisq; Comitibus Italis? Quantam Bransuecen Ducibus, Mansueldis Suarcenburgenfibusq; Comitibus Germanis, Guisiis, Gallis, Lascio Polono declarauerit, enumerare me sit necesse; eadem enim crebrius iterata, inforlescunt. Quem ego quidem Philippum, Hispaniarum Regem Catholicum, ad hunc vel similem modum te Philippum hoc nomine tertium alloquentem viderere mihi videor. Tertius tu fili ordine & nomine isto tot tantisq; Regnis & prouinciis praes meis, quem numerum perfectissimum antiqui olim dixerunt, & in magna veneratione semper & ubiq; habuerunt. Ego autem in te & per te id ita habere se probatum fore vel maxime spero, opto quidem certe. Sed vide ut Alexandro ipsi magno quam eius successoribus potius sis similis, qui ne omnem comparandae sibi gloriae campum pater ipsi praeripuisset, sollicitus admodum à teneris fuerat; & idcirco quidem vix trigesimo tertio aetatis suae anno exacto, tot tantaq; bella confecerat; successores verò Alexandri amplitudini imperii confidentes, desidiosi dissolutiq; facti sunt, & ideo




& ideò re pessimè gesta, Alexandri gloriæ & imperio detraxerunt. Faciliùs enim quàm ab imis ad media itur, à summo ad ima fit delapsus. Habes tu fili non iam externa sed domestica virtutum in tuis exempla etiam quàm plurima. Habes Rudolphos Cæsares duos, difficilimis rebus & temporibus exercitos. Habes totidem Albertos rebus gestis clarissimos, Fridericos mansuetissimos, Maximilianos prudentissimos, Carolum meum patrem tot tantorumq; Regum & Principum victorem, Ferdinandum patrum religiosum, & contra Turcas bellatorem, vt infiniti alii qui eos præcesserunt taceantur. Hos si imitandos, vt facis, tibi proposueris, næ haud à gloriæ illa aberraueris via, vitiis omnibus inuia, & te tuosq; saluabis, beabis, propagabis. Vnum tantùm illum colito Deum Opt: Max: & religionem iustitiamq; incorruptam ac modum in rebus obseruato. Actum de Regnis est, in quibus certa quædam ratio & obseruatio nulla sit, æquitatis. Neminem præterit, qua felicitàte quanta gloria, quàm æquabili iure & iustitia nos nostraq; omnia rexerimus, inuidiam aliorum, quoad eius fieri maximè potuit, declinauerimus. Italiam reginam prouinciarum dicto nostro audientem habuerimus, Lusitaniam aliis Hispanicis regnis infestam imperio nostro adiuxerimus, Belgium cōpescuerimus, Indias retinuerimus, ipsum deniq; terrarum orbem nominis nostri non modò celebritate, verùm etiā terrore & admiratione impleueri-

pleuerimus vniuersum. Quod nos quidem vni illi  
diuino numini & nomini quod semper inuocauimus  
acceptum ferimus, & non humani consilii vi-  
ribus, sed diuino nutu & potestate omnia hîc geri  
in terris & administrari confitemur. Frustra enim  
aliquis se excruciauerit, qui pariter nō orauerit vel  
frequenter. Sed interim tamen monemus & ad-  
hortamur te, nostris vt insistas vestigiis; nec firmū  
aut stabile habiturum te aliquid speres, numine di-  
uino offenso, & religionis auitæ cultu in Repub.  
violato. Hic vnus tibi potissimus fuerit actus. Hæc  
vna ad gloriam via maximè compendiaria. Hæc  
ratio & conformatio vicinorum amoris, subie-  
ctorum erga te fidei & obseruantia, omnium bene-  
uolentiæ consequendæ. Hac tibi via eundum, hac  
contendendum ad altiora est, si vel altiora posse  
dici, vel tantopere debent optari, cū nunquam  
adeò magnus quàm firmus & diuturnus expe-  
tendus sit principatus. Quem vt bona me spes  
tenet, recta patris conscientia fretus, subiecto-  
rum fide & obsequio nixus, more nostro candidi  
animi & salutaris consilii præfidiis communitus, ad  
posteror adeò propagabis. Atq; hæc quidē tecum  
pater. Nos verò quid de eo hoc loco amplius, sem-  
perq; loquamur: nisi quòd ob mortem tanto Rege  
dignā, piē & religiosè obitam, omnium sæculorum  
memoria iure & meritò fuerit prædicandus, qui  
posteaquā sacro Oleo ab Archiepiscopo Toletano  
vinctus fuerat, & arcam in qua recodi debuerat af-  
ferri si-

26  
ferri sibi iusserat, filium ad se vocauit, & vocatum  
ideò esse dixit, vt quem tandem finem res humanæ  
fortiantur intueretur, & mox peractis sacri Olei  
misteriis, cistulam afferri voluit, ex qua Christi cru-  
cifixi effigiem, quam Carolus v. Cæsar eius pater  
venerabatur, & disciplinam (vt vocant) quan-  
dam, sanguine eius adhuc rubentem, qua ipsum se  
affligebat extrahi iussit, ac paulò post omnium  
regnorum administratione filio commissa, & qua-  
tuor aut quinque; potissimum rebus, obedientiâ san-  
ctæ Sedis, defensione Catholicæ religionis, ex-  
terminio omnium hæresum, magistratuum rectè  
administranda iustitia nauitate, Episcoporum &  
Ecclesiastarum omnium delectu, pauperibus larga  
elemosyna eidem commendata, paceq; cum Chri-  
stianissimo rege triduò ante publicata, ac po-  
stremò benedictione à nuntio Apostolico Pa-  
triarcha Gaetano, at quali & quanto, accepta, &  
rursus filio data, totis illis quibus ægrotauit quin-  
quaginta sex diebus, voce illa, Tu solus altissimus,  
Tu solus altissimus, perpetuò ingemināda, septua-  
genarius & ultra senex, Idibus Septēbris, placidif-  
simè expirauit. Quo auctore Hispaniæ, religionē  
auitam inuiolatam, iustitiam rectam, monetam pu-  
rā, quibus maximè gloriātur; Italia quietem, Indiæ  
salutem, Belgiū habet tranquillitatem, ne stabili-  
menta ornamētaque alia, Siciliæ exaggeratos per eū  
portus, in Belgio Plantinianā Typographiam toto  
orbe clarissimam officinam erectam, Erasmo Ro-




terodamo, vt leuissima quæq; afferam, statuã pos-  
tam, & domum eius quam ipse propter illum qui  
literis debetur honos inuisit conseruatam, ne Indiã  
luce Euangelii illustratam, ne sacra Palestinæ loca  
& religiosos circa ea habitantes munificentia eius  
altos sustentatosq; , ne denique tot tantaq; alia, tot  
templa & xenodochia ab eo erecta, tot Cathedra-  
les Ecclesias partim instauratas, partim locupleta-  
tas recenseam; cùm quæ multa multis inaudita fu-  
erint, fidem vel nonnumquã excedere videantur.  
Meliùs hic tot populos rexit, quàm priuatus non  
nemo vixit; tutiùs in negotio quàm alter versaba-  
tur in otio. Armatus minùs crudelitati, quàm ali-  
quis exauctoratus seruiuit lenitati. Diutiùs in me-  
diis turbis animiq; angoribus, quàm alter in volupta-  
tibus deliciisq; vixit infinitis. In hoc postremo v-  
no non adùbrata sed expressa vestigia virtutis, pie-  
tatis & mansuetudinis intuearê, ipsius singularis.  
Qui gentes & nationes, linguis & moribus inter se  
varias, locis temporibusq; disiunctas, consuetudi-  
ne bellandi indomitas, opibus & diuitiis exultan-  
tes, studiorum contentione effrenatas continuerit  
in officio, placauerit beneficio, & in grauibus of-  
fensionibus moderato rexerit imperio, sicut & præ-  
sens ætas & omnis grata veneratura posteritas, &  
nulla obscurata laudes eius sit vetustas, cui poste-  
risq; eius vtinam ita eueniat, vt præclarè sem-  
per de Repub. mereri, nunquam om-  
nino dubitauit.
















Biblioteka Jagiellońska



stdr0008841

Konserwacja i oprawa  
1984 r. - BJ



